



Republika e Kosovës – Republika Kosova
Paneli Zgjedhor për Ankesa dhe Parashtrësia
Izborni Panel za Žalbe i Predstavke



Anr.344/2019

Paneli Zgjedhor për Ankesa dhe Parashtrësia (PZAP), në panelin e përbërë nga gjyqtarët: Gyltene Sylejmani, Faton Ademi dhe Adnan Konushevcu anëtarë, me pjesëmarrjen e zyrtares së lartë ligjore Antigona Murati, duke vendosur lidhur me ankesat e koalicionit Nisma-AKR-PD, me seli në Prishtinë, të paraqitur kundër kryesuesve dhe anëtarëve të Vendvotimit me numër 2114B/01R,02R,03R,04D, në Skenderaj, për shkak të humbjes së disa fletëvotimeve, në ditën e votimit, për Zgjedhjet e Parakohshme për Kuvend të Kosovës, të datës 06.10.2019, në seancën e panelit të mbajtur me 10.10.2019, mori këtë:

V E N D I M

Pranohen të bazuar ankesat: Anr.344/2016 dhe Anr.354/2019 të datës 07.10.2019, të paraqitura nga koalicioni NISMA AKR PD, me seli në Prishtinë, ashtu që Kryesuesit të Vendvotimit (VV) me numër 2114B/01R, Alban Shala, dhe anëtarëve të të njëjtit Vendvotim, Dorent Hajredini, bexhi nr.209, Rrahim Rama, bexhi nr.210, Bozhidar Tomasheviq, bexhi nr.212, Albulena Bajraj, bexhi nr. 211, Armend Çitaku, bexhi nr.208, vëzhguesit: Adem Nimanaj, bexhi nr.3735, Avdi Dragaj. Bexhi. Nr. 3098, Ermal Shala, bexhi nr. 4314, Fazli Miftari, bexhi. Nr.2809, Albert Çitaku, bexhi nr. 027, Valbona Hetemaj, bexhi nr. 3673, Shqipe Misiri, bexhi nr. 311, Alban Çitaku, bexhi nr.4073 dhe, Petit Rama, ju ndalohej pjesëmarrja në zgjedhje në kohëzgjatje prej 5 (pesë) vite si kandidat dhe si pjesë administrative e ndonjë organi zgjedhor, të menaxhuara nën autoritetin e Komisionit Qendror të Zgjedhjeve (KQZ), për shkak të humbjes së disa fletëvotimeve, në ditën e votimit, për Zgjedhjet e Parakohshme për Kuvend të Kosovës, të datës 06.10.2019.

HUDHET e pa lejuar pjesa e ankesës Anr.344/2019 e datës 07.10.2019, e paraqitur nga koalicioni Nisma-AKR-PD, me seli në Prishtinë, në pjesën që i referohet kërkesës për rinumërim nga QNR lidhur në VV e cekura në ankesë, me numër 2114B/01R,02R,03R,04D, në Skenderaj, për shkak të humbjes së disa fletëvotimeve, në ditën e votimit, për Zgjedhjet e Parakohshme për Kuvend të Kosovës, të datës 06.10.2019.

A r s y e t i m

Me datë 07.10.2019, PZAP-i ka pranuar ankesat Anr.344/2019 dhe Anr.354/2019 të paraqitura nga koalicioni NISMA AKR PD, me seli në Prishtinë, kundër kryesuesve dhe anëtarëve të QV 2114B, Vendvotimët me numër 2114B/01R,02R,03R,04D, shkolla "Shotë Galica, në fshatin Runik, komuna Skenderaj, ku pretendojnë se në vendvotimet e cekura në ankesë kanë humbur disa fletëvotime, sipas pohimeve të tyre këto fletëvotime janë vjedhur për çka mendojnë se është dëmtuar rëndë procesi dhe administrimi i votimit dhe numrit të votave në këtë Vendvotim. Parashtruesi i ankesës Anr.354 pohon se në ditën e votimit rreth orës 17:00 nga QV e cekur janë nxjerrë jashtë qendrës rreth 600 fletëvotime të paplotësuara. Lidhur me këtë rast është njoftuar policia dhe Prokuroria e Kosovës, me ç'rast kanë marrë në pyetje anëtarët e KVV-ve dhe trupat udhëheqëse të Vendvotimit.

Kërkon nga PZAP-i, që ankesën e tyre ta aprovojnë dhe të autorizohet KQZ-ja, përkatësisht QNR-në që të bëjë rinumërimin e kutive të vendvotimit të cekur më lartë.

Lidhur me rastin në fjalë PZAP-i e njoftoi edhe Policinë e Kosovës dhe kërkoi nga ata që të ndërmarrin veprime konkrete.

Në raportin e policisë të datës 08.10.2019, theksohet se lidhur me rastin në fjalë më datën 06.10.2019 në QV 2114B në shkollën "Shotë Galica", me të cilin ishin katër VV me numër 2114B/01R,02R,03R,04D, rreth orës 18:40 nga policët e caktuar në këtë QV ishte lajmruar një ankesë. Ankesa në fjalë kishte të bëjë me marrjen e disa fletëvotimeve të zbrazta. Pas pranimit të ankesës, njësia e hetimeve në ora 19:20 ka shkuar në këtë QV dhe ka takuar menaxherin e asaj qendre dhe ankuesin i cili ishte kryesuesë në VV nr. 2114B/01R Alban Shala. Këta persona e kanë njoftuar njësitin hetimor se nga ky VV ishin marrë dhe nxjerrë jashtë vendvotimit nëntë (9) blloka me 450 fletëvotime të zbrazta (një bllok i kishte 50 copë fletëvotime). Sipas kryesuesit të këtij VV, në këtë VV i ka pranuar 750 fletëvotime, votues kishin qenë 889 veta, kishin votuar 299 votues dhe ishin vjedhur 450 fletëvotime. Kryesuesi i këtij VV, Alban Shala kishte deklaruar se vjedhjen e fletëvotimeve e ka vërejtur rreth orës 18:00. Në këtë VV të angazhuar në procesin zgjedhor kanë qenë, Alban Shala Kryesues, anëtarët :Dorent Hajredini, Bozhidar Tomasheviq, Albulena Bajraj, Armend Çitaku, vëzhguesit: Adem Nimanaj, Avdi Dragaj, Erman Shala, Fazli Miftari, Albert Çitaku, Valbona Hetemaj, Shqipe Misiri, Alban Çitaku dhe Petrit Rama. Pas intervistimit të këtyre personave, të gjithë janë deklaruar se fletëvotimet mungojnë por asnjëri nuk ka ofruar informata se kush apo mënyrën se si janë nxjerrë këto fletëvotime jashtë atij VV, dhe se kanë deklaruar gojarisht se mungesën e fletëvotimeve e kanë kuptuar pasi e ka alarmuar rastin kryesuesi i këtij VV njëherit edhe ankuesi i këtij rasti Alban Shala. Sipas raportit policor, kryesuesi i këtij VV, Alban Shala, me të cilën e ka paraqitur rastin, pas marrjes në pyetje nga njësia e hetimit kishte deklaruar se nuk ka ndonjë informat se kush i ka marrë fletëvotimet, dhe e ka përjashtuar mundësinë që dikush nga anëtarët e atij komisioni zgjedhor të ketë qenë i përfshirë në marrjen e fletëvotimeve. Ai ka deklaruar se në një moment për pak minurta kishte dal nga VV për ta përshëndetur dikë në koridor të shkollës dhe në atë moment ka vërejtur një person i panjohur për të kishte hyrë dhe i kishet marrë fletëvotimet, por që sipas tij nuk është anëtar i komisionit. Në raportin policor është cekur se nga fletëvotimet e humbura vetëm 100 nuk janë gjetur ndërsa të tjerët kanë qenë të plotësuara, të mbushura. Njësia hetuese, fletëvotimet e

gjetura i ka marrur për ekzaminim si dhe DVD nga kamera e shkollës për të vërtetuar a kanë funksionuar kamerat, pasi që menaxheri i këtij QV, njëherit drejtor i kësaj shkolle, kishte deklaruar se nuk kanë qenë në funksion kamerat. Deklarata e dytë e kryesuesit të këtij VV është dhënë më datë 07.10.2019, Alban Shala, i cili ka deklaruar se i dyshuraj për marrjen e fletëvotimeve është një person që nuk ka qenë i angazhuar në procesin zgjedhor, por që deklaroi se nuk e ka njohur më parë.

Paneli, paraprakisht ka vlerësuar se ankesat: Anr.344/2019 dhe Anr.354/2019, të datës 07.10.2019, janë për nga përmbajtja të njëjta, për nga natyra e shkeljes së pretenduar janë të njëjta, janë paraqitur nga e njëjta palë ankuese kundër subjektit të njëjtë politik, prandaj paneli bazuar në nenin 8 paragrafi 3 i Rregullave dhe Procedurave Nr.02/2015, të PZAP-it, në të cilën përcaktohet se: *Me qëllim të lehtësimit të shqyrtimit të ankesave kryesuesi i panelit vend marrës mund të vendos ta bëjë bashkimin e ankesave që përmbajnë në vete çështje të ngjashme dhe se ato ankesa të trajtohen me një vendim*", andaj paneli bëri bashkimin e ankesave dhe për të njëjtat vendosi me një vendim, si në dispozitiv të këtij vendimi.

Paneli, pasi që shqyrtoj pretendimet e palëve në procedurë dhe analizoi shkresat e lëndës gjeti se ankesat janë pjesërisht të **bazuara** për këto arsye:

Neni 94 i LZP-së përcakton qartë se kryesuesi, anëtarët e KVV-së dhe vëzhguesit e akredituar të pranishëm lejohen të bëjnë shënime apo vërejtje në librin e votimit (librin e shënimeve në vendvotim) në të cilën shënohen ngjarjet që ndodhin në vendvotim.

Paneli, vlerëson se pretendimi i parashtruesit të ankesës lidhur me mos evidentimin e personave apo personit i cili ka bërë nxjerrjen e fletëvotimeve nga QV 2114B e përkatësisht nga VV nr. 2114B/01R, është i qëndrueshëm sepse nga raporti i policisë i datës 08.10.2019 shihet qartë se kryesuesi i Vendvotimit Alban Shala ka njoftuar policinë lidhur me parregullsinë gjatë procesit zgjedhor-humbja e fletvotimeve. Ky rast është hetuar edhe nga policia në bazë të njoftimit të bërë nga kryesuesi i këtij vendvotimi, dhe nga hetimet e bëra është konstatuar se fletëvotimet e humbura janë gjetur të plotësuar në të njëjtën QV në katin e epërm të atij vendvotimi, si dhe në këtë raport janë shënuar emrat e personave të angazhuar në procesin zgjedhor në këtë vendvotim, ndaj të cilëve paneli, i ka shqiptuar dënim si në dispozitiv të këtij vendimi.

Lidhur pjesën e dispozitivit të këtij vendimi që ju është ndaluar komisionereve dhe vëzhguesëve në vendvotimin Nr. 2114B/01R, pjesëmarrja në zgjedhje në kohëzgjatje prej 5 (pesë) vite, si kandidat dhe si pjesë administrative e ndonjë organi zgjedhor, të menaxhuara nën autoritetin e Komisionit Qendror të Zgjedhjeve (KQZ), vendimi nga PZAP është marrë në bazë të nenit 120 par.3, pika d), në të cilin parashihet së "Në rast se ka ndodhur një shkelje e këtij ligji ose rregullave zgjedhore e cila e minon integritetin e zgjedhjeve PZAP-i mundet. d) Ndalojë një individ të marr pjesë në zgjedhjet e mbajtura nën autoritetin e KQZ-së, si kandidat apo edhe si pjesë administrative e ndonjë organi zgjedhor, për një periudhë kohore që nuk u kalon gjashtë (6) vite", pasi që PZAP-i, ka konstatuar se asnjëri nga komisioneret duke e përfshirë edhe kryesin e

2114B, nuk e kanë ndërmarr asnjë veprim në ditën e votimit të datës 06.10.2019, lidhur me evitimin e shkeljeve, siç është pretenduar në ankesë.

Paneli nuk është lëshuar fare në vlerësimin e pretendimeve ankimore, lidhur me kërkesën për rinumërim nga QNR lidhur në vendvotimet e cekura në ankesë, me numër 2114B/01R,02R,03R,04D, pasi që kjo kërkesë duhet të parashtrohet me rastin e shpalljes së rezultatit përfundimtarë nga KQZ-ja, e jo në këtë fazë të procesit zgjedhor. Në rastin konkret nga KQZ-ja, nuk është marrë vendimi përfundimtar mbi shpalljen e rezultatit përfundimtar, andaj Paneli vendosi që në pjesën e dytë të dispozitivit ta hudhë si të parakohshme ankesën e ankuesit.

Nga sa u tha me sipër PZAP-i, konform dispozitave ligjore të nenit 118 par. 1 dhe 5 lidhur me nenin 122 të LZP-së, vendosi si në dispozitiv të këtij vendimi.

Paneli Zgjedhor për Ankesa dhe Parashtrës

Anr. 344/2019 më datën 10.10.2019



Këshillë Juridike: Kundër këtij vendimi pala e pakënaqur, mund të paraqet ankesë brenda afatit njëzetekatër (24) orëve nga momenti i marrjes-pranimi të këtij vendimi, në Gjykatën Supreme.